

Kalaallit Nunaanni efterskolimik suli ataatsimik, Tasiilami inissinneqartussamik, UKA 2013-imut pilersitsinissaq pillugu Naalakkersuisut siunnersuusiornissamik peqquneqarnissaannik Inatsisartut aalajangiiffigisassaattut siunnersuut
(Inatsisartunut ilaasortaq Harald Bianco, Inuit Ataqtigiit)

Akissuteqaat

(Ilinniartitaanermut, Ilisimatusarnermut Nunanullu Avannarlernut suleqateqarnermut Naalakkersuisoq)

Aappassaaneerinninneq

Kalaallit Nunaanni efterskolimik suli ataatsimik, Tasiilami inissinneqartussamik UKA 2013-imut pilersitsinissaq pillugu Naalakkersuisut siunnersuusiornissamik peqquneqarnissaannik Inatsisartut aalajangiiffigisassaattut siunnersuutip aappassaaneernissaanut atatillugu Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap isumaliutsissiissutaa sukumiisoq pillugu ataatsimiititaliaq Naalakkersuisut qutsavigaat.

Naalakkersuisut malugaat, ataatsimiititalilaaq isumaqatigiittoq aalajangiiffigisassatut siunnersuummut allannguutissamik saqqummiussaartoq, taassumalu kingorna siunnersuut imatut oqaasertalerneqarluni: *Tasiilami efterskolimik inissinissaq pillugu aalajangiinissamut naammattumik tungavissaqaqqullugu Naalakkersuisut kingusinnerpaamik upernaakkut 2013-imi ataatsimiinnermut nassuiaasioqquneqarnissaannik Inatsisartut aalajangiiffigisassaattut siunnersuut.*

Naalakkersuisut malugaat Naalakkersuisut siullermeerinninnermut akissuteqaataat ataatsimiititaliallu isumaliutissiissutaa annertunerusumik assigiinngissuteqanngitsut. Ataatsimiititaliaq taamaalilluni allappoq ataatsimiititaliaq isumaqartoq pingaaruteqartorujussuusoq efterskolissamik pilersitsinissaaneq ilinniartitaanermi suliniutinut allanut siamasissumik ataqtigiissarneqartariaqartoq, taamaammallu Naalakkersuisut kajumissaarneqarput siunnersuut ilinniartitaanermut pilersaarutissamut II-mut sanilliuteqqullugu, aammali siunnersuut inuusuttut ajornartorsiuleraannaat pillugit nassuiaammut, atuartut inaat pillugu nassuiaammut, 2010-mi taamaatiinnartarneq pillugu misissuinermit aammalu akiitsunut aningaasaliisarnermullu periusissiamut naleqqiuteqqullugu. Isummat taakku Naalakkersuisut isumaqatigaat.

Atassuteqaatini unammilligassat, illut Tasiilamilu inuttut atukkatigut pissutsit aammalu ilinniartitsisunik piginnaasaqartunik sulisunillu allanik sulisussarsinnaanermut periarfissat nassiuuammi aamma ilanngunneqartariaqarput. Ilinniartut naammattumik amerlassusillit ilinniartorilerniarneranni ajortorsiutit pillugit Kangerlussuarmit efterskolimi aamma Paamiuni Imarsiornermik Ilinniarfimmi misilittakkat isumaliuteqarnermi aamma ilanngunneqarsinnaapput.

Siunnersuutip siullermeerneqarnerani akuerineqannginnissaa Naalakkersuisut inassuteqaatigaat, Naalakkersuisut ilaatigut isumaqarmata efterskolimik amerlanerusunik pilersitsinissaq pilersaarutinut allanut ilinniartitaaneq pillugu suliarineqartunut sanilliullugu isigineqartariaqartoq, ilaatigullu efterskolimik pilersitsinissaq akisoorujussuusammaat.

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliaq isumaliutissiisummi allappoq, siunnersuutip Nunap Karsianut taamaalillunilu inuiaqatigiinnut aningaasatigut kingunissai tamarmiusut ataatsimiititaliap suliassarinnigikkaa. Ataatsimiititaliilli pingaartutut isigaa, Tasiilami efterskolimik pilersitsinerup aningaasatigut kingunissai tamakkiisumik nassuiarneqassasut.

Tamanna tunngavigalugu Naalakkersuisut isumaqarput, siunnersuut pillugu aalajangiinissamut tamakkiisumik tunngaveqarnissaa pisariaqartinneqarnera aammalu sanaartornermut ingerlatsinermullu aningaasaliissutinut kingunissai misissussallugit pingaaruteqartorujussuunera pillugit Ataatsimiititaliap Naalakkersuisullu isumaat imminnut ungasinngitsut.

Naalakkersuisut taamatut oqaaseqarlutik Ataatsimiititaliap inassuteqaata tusaatissatut tiguaat.